

SULIT



JABATAN PELAJARAN NEGERI NEGERI SEMBILAN DARUL KHUSUS

PRAPENILAIAN MENENGAH RENDAH 2012

02/2

BAHASA MELAYU

Kertas 2

Ogos 2012

2 Jam

Dua jam

JANGAN BUKA KERTAS SOALAN INI SEHINGGA DIBERITAHU

1. *Kertas soalan ini mengandungi empat bahagian: **Bahagian A, Bahagian B, Bahagian C dan Bahagian D.***
2. **Bahagian A** terdiri daripada dua bahagian: **Bahagian A(i) dan Bahagian A(ii).** *Anda dikehendaki supaya menjawab kedua-dua bahagian tersebut. **Bahagian B dan Bahagian D** juga mesti dijawab. Manakala **Bahagian C** mempunyai lima pilihan soalan dan anda diminta supaya menjawab satu soalan sahaja.*
3. *Anda dinasihati supaya mengambil masa 40 minit untuk menjawab **Bahagian A**, 25 minit untuk **Bahagian B**, 45 minit untuk **Bahagian C** dan 10 minit untuk **Bahagian D.***
4. *Jawapan anda hendaklah ditulis dalam buku jawapan yang disediakan. Sekiranya buku jawapan tidak mencukupi, sila dapatkan helaian tambahan daripada pengawas peperiksaan.*

Kertas soalan ini mengandungi 6 halaman bercetak.

Bahagian A(i) : Ringkasan

[20 markah]

Baca petikan di bawah dengan teliti. Berdasarkan petikan tersebut, tulis sebuah ringkasan tentang **peranan remaja dalam kejiranan**. Panjang ringkasan anda hendaklah **tidak melebihi 80 patah perkataan**. Anda digalakkan menggunakan ayat anda sendiri tanpa mengubah maksud asal petikan.

Masyarakat bermula daripada jiran. Jiran pula terdiri daripada semua lapisan umur termasuk remaja. Dalam hal ini, remaja ada peranannya yang tersendiri. Konsep kejiranan serta persaudaraan cukup menarik dan mesti dikekalkan oleh masyarakat, khususnya golongan remaja.

Remaja boleh mengaktifkan diri melalui persatuan masyarakat seperti Rukun Tetangga (RT). Kini, aktiviti RT semakin meluas fungsinya seperti aktiviti pendidikan, sukan, keagamaan, rekreasi, dan kesihatan. Remaja boleh terlibat dengan aktif. Melalui persaudaraan dan semangat kejiranan dapat mewujudkan rasa kasih sayang, bantu-membantu dan kekuatan dalam kalangan rakyat. Malah, melalui suara kolektif remaja dapat saling membantu, mengingatkan dan menegur sesuatu yang tidak kena dalam masyarakat. Semangat kejiranan dan persaudaraan yang akrab juga dapat menghilangkan perasaan iri hati, dengki, bermusuhan-musuhan dan sifat negatif lain yang membawa perpecahan.

Jiran yang sepakat dan bersatu padu mampu menjamin keselamatan kawasan setempat daripada ancaman luar. Semuanya dapat dibendung jika jiran memainkan peranan masing-masing dan remaja boleh mengambil inisiatif dengan melaporkannya kepada pihak berwajib setiap kali menyedari berlakunya perkara yang meragukan. Sesungguhnya, remaja boleh bekerjasama dengan media massa untuk menyemarakkan semangat kejiranan. Misalnya, dengan memaparkan rencana yang menekankan peri pentingnya semangat kejiranan dan perpaduan. Selain itu, remaja boleh berinteraksi dengan ibu bapa untuk memastikan kejiranan golongan remaja sentiasa kondusif dan baik.

Mereka juga perlu berbincang dan bersepakat dalam melaksanakan program yang bersesuaian agar matlamat yang satu dapat dicapai. Hal ini demikian kerana semangat kejiranan mampu mengekalkan keamanan, keselamatan dan ketenteraman. Remaja mesti menjadikan agama sebagai pegangan utama agar lebih bertanggungjawab kepada diri sendiri, kejiranan dan negara.

Remaja perlu mempunyai daya tahan dari segi fizikal dan mental agar dapat membentuk kejiranan yang *kental dan utuh*. Elemen jati diri dan kawalan diri yang kukuh dapat mengawal perasaan dan emosi daripada terjerumus ke lembah yang hina. Segala usaha untuk memupuk semangat kejiranan dalam kalangan masyarakat tidak dapat dicapai dalam masa yang singkat. Walau bagaimanapun, sentiasalah beringat bahawa tiada gunung yang tidak dapat didaki, tiada lurah yang tidak dapat dituruni.

(Dipetik dan diubah suai daripada rencana 'Hidup Berjiran Muafakat Masyarakat',
Juliana Mansor, *Dewan Siswa* Mac 2011)

[Lihat halaman sebelah
SULIT

Bahagian A(ii) - Pemahaman

[10 markah]


Berdasarkan petikan **Bahagian A (i)**, jawab soalan-soalan yang berikut dengan menggunakan ayat anda sendiri.

- 1 Berikan maksud rangkai kata *kental dan utuh*. [2 markah]
- 2 Berdasarkan petikan, nyatakan kesan jika jiran hidup bersatu padu. [4 markah]
- 3 Pada pendapat anda, apakah yang akan berlaku jika jiran mempunyai sikap mementingkan diri sendiri sahaja? [4 markah]

Bahagian B

[20 markah]

Berdasarkan rajah di bawah, huraikan pendapat anda tentang peranan pelbagai pihak untuk memupuk minat membaca dalam kalangan masyarakat. Panjangnya huraian anda hendaklah tidak melebihi 120 patah perkataan.



Bahagian C

[40 markah]

Pilih satu daripada soalan di bawah. Tulis sebuah karangan yang panjangnya lebih daripada 180 patah perkataan.

- 1 Kelas anda telah memenangi pertandingan keceriaan kelas.
Tuliskan pengalaman anda dan rakan-rakan menceriaan kelas.
- 2 Anda selaku pegawai daripada Jabatan Kebajikan Masyarakat telah diundang ke sebuah sekolah untuk menyampaikan ceramah yang bertajuk 'Pembentukan tingkah laku dan keperibadian anak-anak bermula dari rumah'.
Tulis ceramah tersebut selengkapnya.
- 3 Masalah ponteng sekolah begitu berleluasa di sekolah anda.
Anda ingin mengemukakan cadangan-cadangan bagi mengatasi masalah tersebut kepada pengetua.
Tulis surat itu selengkapnya.
- 4 Penggunaan internet secara meluas banyak memberikan manfaat kepada masyarakat.
Bincangkan pernyataan di atas.
- 5 ... Akhirnya, Danial yang lemah dalam pelajaran dan sering kali gagal dalam peperiksaan berjaya mendapat keputusan yang cemerlang setelah berusaha bersungguh-sungguh. Baru kini dia sedar akan kebenaran kata-kata gurunya bahawa belakang parang kalau diasah lagikan tajam.
Tulis cerita yang berakhir dengan perenggan di atas.

Bahagian D

[10 markah]

*Jawapan anda hendaklah berdasarkan **ketiga-tiga** novel yang telah anda kaji dalam tingkatan 1, 2 dan 3.*

- (i) **Sukar Membawa Tuah**, karya M.Z. Erlysha
- (ii) **Wira Persona Avatari**, karya Ahmad Zaki Abu Bakar
- (iii) **Merenang Gelora**, karya Ruslan Ngah

Ketabahan dalam menghadapi dugaan dan cabaran
--

Huraikan **tiga** contoh peristiwa berkaitan persoalan di atas, iaitu **satu** contoh peristiwa daripada **setiap** novel.

KERTAS SOALAN TAMAT